

## LU CHIAMU DI LA MUSA

Curri püeta curri! Nun la senti?  
È la to musa chi ti sta chiamannu!  
Nun fari finta ch' 'un succedi nenti,  
talìa com'è chi curri e va circannu!

E lu püeta prestu tuttu modda  
chì nun resisti a 'stu richiamu duci;  
'stu cantu di sirena l'arrimodda,  
l'attira versu d'idda cu la vuci.

E curri comu Ulissi a li sireni,  
chi mancu si l'attaccanu resisti,  
nun c'è a lu munnu forza chi tratteni  
quann'è chi 'sta criatura chiama e 'nzisti.

Davanti ad idda lu püeta mori  
e tuttu lu so 'ncantu lu subisci;  
ci dici 'nta l'aricchi du' palori,  
lu lassa sulu e lesta poi spirisci.

*2008*

## GUERRA 'NTIRIORI

Mi fazzu guerra eppuru sugnu 'n paci  
e perdu e vinciu 'nta 'na sula botta;  
'na parti mia vucìa e l'otra taci  
e cu mia stessu fazzu la me lotta.

Mi fazzu li dumanni chiù sigreti,  
dumanni ch' 'un si ponnu fari a nuddu;  
'nta la me testa 'sti pinzeri squeti  
su' 'n cerca di risposti cu lu puddu.

Ma cu' mi li pò dari veramenti?!  
Cu 'sti pinzeri cu' è chi ci cuntrasta?  
Mei sulu sunnu o l'hannu l'autri genti?

E 'ntantu 'a cunfusioni mi suvrasta.  
Attentu 'u cori oppuru ascutu 'a menti?  
O forsi 'un hâ ascutari a nuddu e basta?!

2008

## LU CUNTRARIU

Esisti d'ogni cosa lu cuntrariu,  
è liggi d'esistenza 'nta lu munnu,  
c'è chiddu beddu e puru chiddu lariu,  
esisti l'omu siccu e chiddu tunnu.

E comu c'è lu jornu c'è la sira,  
si c'è lu suli esisti puru 'a luna,  
pi chiddu chi sta fermu 'n autru gira,  
ci sunnu chiddi curti e li bistiuna.

Si c'è lu spertu c'è lu scimunitu,  
c'è l'omu onestu e chiddu criminali,  
ma pozzu cuntinuari a l' infinitu

picchi si sapi, è liggi universali.  
Lu fattu ch'avia a essiri pruibitu?  
Chi c'è lu beni e contru c'è lu mali.

*2008*

## LU PAGLIACCIU

Chi ni sapiti viatri d'un pagliacciu,  
di la so vita e chiddu chi ha subìtu?!  
Pinzati, lu so cori chi è di ghiacciu  
e sapi fari sulu 'u scimunitu?

Viditi sulamenti la faciàta,  
lu so surrisu sempri disignatu;  
l'ammùccia cu 'dda màschira pittata  
soccu è chi prova e chiddu chi ha passatu.

Regala lu surrisu a tutti quanti  
e puru si lu cori ci fa mali  
abballa, canta, ridi e 'nta 'dd'istanti  
cumanna la so vita surriàli.

Ma quannu chi la sira poi finisci  
di fari lu spittàculu a la fera,  
'ddu truccu di la facci ci spirisci  
e torna a la so vita, chidda vera.

'Nta lu tīatru, chiddu di la vita,  
pi un attimu addiventa spittaturi,  
ddà 'n menzu la so facci è 'a chiù pulita  
e l'autri genti 'nveci su' l'atturi.

Taliànnuli li squatra ad una ad una  
soccu è chi fannu tutti chiddi facci;  
si senti sulu, chianci e si n'adduna  
chi fora ci su' un saccu di pagliacci.

2008



## DUNNI SI'?!

Dunni si' quannu trema la terra  
chi cafudda li so' scutuluna  
comu un cani chi scòtula e afferra  
comu fùssimu so' piddizzuna?!

Dunni si' quannu 'u mari agitatu  
grapi vucca chi pari un liuni,  
comu un mostro di 'n autru criatu  
chi s'agghiutti varcuZZi e pirsuni?!

Dunni si' quannu 'u ventu arrabbiatu  
chiù nun ciuscia pi fari carizza  
ma addiventa un cicluni 'nfuriatu  
chi distrudi dunn'è chi s'appizza?!

Dunni si' quannu mori un nuzzenti  
picchi 'un havi di soccu manciari?!  
Quannu un omu ti mori pi nenti  
picchi 'n autru lu vosi ammazzari?!

Dunni si'? Dunni si' Signuruzzu?!  
Ma picchè certi voti 'un nni vidi?!  
Eu lu sacciu, nun fai cosi a muzzu;  
però cedu e poi perdu la fidi...

Sugnu 'n menzu a 'na granni bufèra  
e nun sacciu chi strata pigghiari.  
Forsi chista è 'na tinta prijera  
ditta sulu pi nun bistimiari.

2009

## LU DISTINU

Mi dèssiru di nicu, lu distinu  
nni lu facemu niatri, ‘un c’è questioni;  
si pò canciari sorti, lu caminu  
e migghiarari ‘a nostra situazioni.

M’haiu ammazzatu tutta la me vita  
currenno sempri, comu un dispiratu;  
la strata ha statu longa e chiù ‘n “salita,”  
m’haiu fattu chiù curaggiu, ‘un m’haiu firmatu!

E contru di lu tempu vaiu currenno  
- cavaddi ‘n cursa, senza li patruna -  
vicinu, spada a spada èmu sbattenu  
jittànnu di li naschi li ciusciuna.

Ma quannu chi la cursa è a conclusioni  
mi sentu lu patruni di lu munnu;  
mi grapu l’occhi ed era un illusioni:  
lu vincituri è iddu ed eu sicunnu!

Allura poi mi fermu ‘nta ‘na botta,  
mi dicu: “Basta! Datti ‘na calmata!  
È persa già ‘n partenza la to lotta,  
la vita l’hâ pigghiari a la jurnata”...

E penzu a tutti li me’ ‘nznamenti,  
a li prugetti fatti a tavulinu;  
ma ‘nta sta vita ‘un si programma nenti  
chì nasci l’omu cu lu so distinu.

2008

## MACARI!

Si ci fussi 'na màchina fatta  
pi 'nta 'u tempu putiri viaggiari,  
rifacissi la vita chiù esatta  
e l'errura putissi aggiustari!

Tuttu chiddu chi fici sbagghiату  
cancillassi cu un corpu di spugna;  
tuttu chiddu chi m'ha danniggiatu  
e m'ha fattu campari cu l'ugna.

Si nascissi arrè 'n'äutra vota  
- Ricurdannu la vita passata -  
già sapissi lu giru d' 'a rota,  
la sicunna l'avissi abbirsata.

Si la vita l'avissimu 'ncisa  
comu un discu cu tanti canzuni,  
dopu avilla arrè ntisa e rintisa  
la scigghissi ammaccannu un buttuni.

Ma la vita nun è 'na canzuna  
o lavagna appizzata a li mura,  
Chi cumanni ammaccannu buttuna  
o cancelli e curreggi l'errura.

E di vita una sula n'avemu!  
Nun si nasci, si mori e ritorna!  
Tuttu chiddu chi passa scrivemu  
'nta la storia di tutti li jorna.

'Sti pinzeri, anticchiedda 'nquitanti,  
ma sapiddu si l'havi cu' è ed è?!  
Chi la vita si campa 'n avanti  
e però si capisci narré.



## SPIRANZA

Un jornu mi sintìa un pocu stranu,  
mi misi ‘nta lu lettu, m’appuiàvi;  
avìa la testa china quantu un tiànu,  
lu sonnu mi vinciu, m’appinnicavi.

Allura a l’impruvvisu mi cumpari  
‘na dama bianca, comu ‘na madonna,  
mi dissi: “ Stai tranquillu, ‘un ti scantari,  
t’avìa a parrari e vinni ‘nta li sonna.

Picchi ‘un mi cerchi chiù, nun hai chiù fidi?  
Si’ juntu troppu stancu di luttari?  
T’arrenni a lu distinu e nun mi cridi,  
pirdennu puru forza di spirari?

Lu sacciu chi n’hai avùtu cosi torti,  
ma a soccu servi fàriti ‘nfussari?!  
Disidirannu a voti anchi la morti...  
Riagisci! Nun ti fari supranjàri!”

Ci dissi: “ Ma cu’ si’? Chi vai circannu?  
Ci manchi sulu tu chi mi turmenti!  
Ma ti n’adduni comu vaiu campannu?  
Ormai finiu, nun criu chiù a nuddu e a nenti...”

“Amicu caru, tu ti stai sbagghiannu,  
mi dici chi cunchiùdi d’accussi?  
‘Nta lu duluri cedi e stai affunnannu  
e jetti la to vita, ma picchi?!”

Vinemu ‘nta stu munnu pi suffriri  
e certi voti servi tanta panza;  
ti dugnu ‘stu cunsigghiu, ‘un t’avviliri;  
nun pérdiri la fidi e la spiranza.

## LA SAGGIZZA DI L'ORVU

Siddiatu caminava strata strata,  
la testa di pinzeri smaciddiàva  
cu l'occhi 'n terra e l'arma scunzulata  
jia appressu 'i pedi e nun mi n'addunava.

Di 'n vucca lampi, fulmini e saitti  
e contru lu Signuri bistimiava;  
parrava sulu e cu li denti stritti  
nun mi ricordu soccu sbruculava:

“Picchè 'sti cosi tinti sempri a mia?!  
Picchè Signuri l'hai cu la me casa?!  
Picchè 'sta malasorti nun firria?!  
Pirdunami Signuri, ma si sfasa!”

Quann'è chi a l'impruvvisu di luntanu  
'na vuci calma, assai rassirianti:  
“Amicu, l'hai vutatu lu to tiànu?  
Picchè ci l'hai cu Diu e cu li Santi?”

Ma t'hai firmatu mai a taliari 'n tunnu?  
Lu celu, 'u mari e tutta la natura  
cu tutti li biddizzi di lu munnu?  
Tu fèrmati a taliari 'sti splinnura!

Nun fari sulu casu a li svinturi  
chi fannu lu to sangu 'ntussicatu,  
nun bistimiari contru lu Signuri,  
ringrazialu, picchè si' fortunatu!”

S'alluntanau cu lu so passu stancu  
e cu la facci un pocu surridenti;  
eu, quannu vitti 'ddu vastuni biancu  
ristavi mutu e 'un sappi diri nenti...

## LA VERA SCARSIZZA

*(per la dolorosa e prematura scomparsa dell'amico Mario Filippo Caleca)*

Persi veru 'na granni ricchezza,  
nun si tratta di sordi o di "beni",  
lu me cori cu tanta amarizza  
esti chinu, cucùcciu di peni.

Chianci puru lu celu scunfittu,  
mi cummogghia li lacrimi 'n visu;  
jettu vuci ristannumi zittu.  
Lu cunfortu? Chi sta 'n paradisu.

Tutta 'n tunnu c'è un saccu di genti,  
c'esti vuci di cori strazzati;  
lu culuri, lu chiù priputenti,  
fa di sfunnu a 'sti genti abbrazzati.

Nun ci su' li culura brillanti,  
lu caluri chi c'è 'nta l'estati  
ma lu friddu d' 'u niuru e chianti  
'nta la morsa nni teni bloccati.

Quannu perdi 'n amicu 'mpurtanti  
ti n'adduni soccu è la ricchezza,  
ch' 'un è fatta di sordi e diamanti  
e canusci la vera scarsizza.

2008